



**Komunikadu Imprensa**  
**27 Novembru 2024**

**Tribunál Judisiál Primeira Instánsia Oekusi kondena pena efetiva tinan rua (2) ba arguidu kazu violénsia doméstika: JSMP konsidera desizaun ne'e hanesan avansu pozitivu**

Iha 07 Novembru 2024, Tribunál Judisiál Primeira Instánsia Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SO hasoru nia feen, iha RAEOA.

Iha desizaun ba kazu ne'e, tribunál konklui prosesu ne'e no kondena arguidu ho pena efetiva tinan rua (2) prizaun.

JSMP fiar katak desizaun ne'e hanesan lisaun ida ba ema hotu atu evita krime violénsia doméstika no prevene krime hanesan hasoru membru família iha futuru. Bazeia ba monitorizaun JSMP nian iha tribunál judisiál primeira instánsia sira, hatudu katak kazu ne'ebé rejista aas no julga iha tribunál maioria mak kazu violénsia doméstika. Tendénsia ne'e hatudu katak comunidade barak abitua rezolve problema uma laran ho de'it violénsia, nune'e desizaun ne'e hanesan mensajem ida ne'ebé forte ba sociedade katak violénsia doméstika nu'udar krime sériu ne'ebé merese atu hetan kondenasau ne'ebé apropriadu hanesan iha kazu ida ne'e.

“JSMP apresia no konsidera desizaun ne'e hanesan avansu ka progresu pozitivu ida ba prevene aktu krime sira ho natureza violénsia doméstika no bele sai hanesan lisaun edukativa ba arguidu nomós sociedade atu hakotu korente violénsia sira iha sociedade no la hatoman an atu rezolve problema uma laran ho violénsia,” dehan Sr. Casimiro dos Santos, Diretór Ezekutivu Interinu JSMP.

Alende ne'e, JSMP orgullu tanba juis sira konsidera hanoin sira ne'ebé durante ne'e JSMP hato'o atu asegura katak kazu violénsia doméstika sira tenke iha desizaun ida ne'ebé adekuaudu atu arguidu sira la repete tan hahalok hanesan iha futuru.

Iha kazu ne'e prokuradór akuza katak iha 27 Agostu 2023, maizumenus iha oras tuku 13:00 meiodia, arguidu ho kondisaun lanu husu osan ba ofendida atu hola tua atu sira na'in rua hemu. Maibé ofendida hatan katak “*ofendida atu ba ofendida nia inan nia uma*”, nune'e arguidu tuku dala ida iha ofendida nia matan parte karuk, basa dala ida iha kanuruk, arguidu kontinua foti ai-ida atu baku ofendida, maibé ofendida kaer ai-ida hodi satan netik no ai refere kona fali iha arguidu nia reen-toos kauza bubu. Kazu ne'e aneksa hamutuk ho relatóriu médiku hosi PRADET no fotografía kona-ba aktu violénsia ne'e hasai hosi polísia.

Prokuradór akuza arguidu kontra artigu 145 KP kona-ba krime ofensa ba integridada fízika simples ho moldura penál to'o tinan 3 ka multa, konjuga ho artigu 2, 3 (a), 35(b) no 36 LKVD.

Iha julgamentu, arguidu konfesa parsial ba faktu sira hosi akuzasaun ministériu públiku nian katak iha faktu balun loos no balun laloos. Tuir arguidu faktu ne'ebé loos mak arguidu tuku dala ida iha ofendida nia matan parte karuk no basa dala ida iha kanuruk. Entretantu faktu kona-ba arguidu foti ai-ida atu baku ofendida, no ofendida satan netik ai refere kona fali iha arguidu nia reen-toos kauza bubu ne'e laloos. Tanba iha akontesimentu ne'e ofendida mak lori ai baku dala tolu iha arguidu nia ulun rezulta kanek no suku pontu tolu no ofendida mós basa dala ida iha arguidu nia hasan. Arguidu mós deklarara katak agora dadaun arguidu iha hela prizaun preventiva ba kazu abuzu seksuál ba menór hasoru viziñu.

Depoizde tribunál konfirma ho ofendida kontinua konfirma faktu sira iha akuzasaun, ofendida mós deklarara katak arguidu ho ofendida la'ós, foin primeiravés mai hatan iha tribunál, maibé ho kazu ne'e ba dala tolu ona mai hatan iha tribunál. Nune'e mós ba kazu ne'ebé hanesan tribunál kondena ona arguidu, maibé arguidu sempre halo agresaun hasoru ofendida. Tanba ne'e ofendida husu ba tribunál atu kondena arguidu ho pena prizaun, tanba bainhira arguidu fila fali ba uma sempre halo agresaun hasoru ofendida. Entretantu relasiona ho arguidu ninia deklarasaun katak iha akontesimentu ne'e ofendida mós halo agresaun hasoru arguidu ne'e laloos.

Iha avaliasaun ba faktu sira hotu, tribunál prova katak provadu iha 27 Agostu 2023, maizumenus iha oras tuku 13:00 meiodia, arguidu tuku dala iha ofendida nia matan parte karuk, basa dala ida iha kanuruk no arguidu foti ai ida atu baku ofendida, maibé ofendida kaer ai ida hodi satan netik no ai refere kona iha arguidu nia reen-toos kauza bubu iha arguidu nia reen-toos. Entretantu kona-ba deklarasaun arguidu nian ne'e tribunál konsidera la provadu.

Alende ne'e tribunál mós relembra faktu akontesimentu sira antes katak arguidu antes ne'e komete ona krime dala rua hasoru ofendida no mai hatan ona iha tribunál no krime ne'ebé rejistra ho Nú. Prosesu: 0127/19.OESIC kondena ho pena prizaun tinan 2 suspende ba tinan 3 no krime ho Nú. Prosesu: 0040/20.OESIC kondena ho pena prizaun tinan 1 suspende ba tinan 1.

Bazeia ba faktu provadu sira no tetu mós ho sirkunstánsia agravante sira hanesan arguidu la arrepende ninia hahalok, meizmu arguidu mai ona tribunál dala rua no tribunál kondena ona arguidu, maibé nafatin repete krime hanesan hasoru ofendida, ho nune'e tribunál konklui prosesu ne'e no kondena arguidu ho pena prizaun tinan 2.

Kazu ne'e rejista iha tribunál ho Nú. Prosesu: 0078/23.OESIC, leitura sentensa ne'e prezide hosi juis singulár, Dr. Evangelino Belo, enkuantu Prokuradór representa hosi Dr. Mateus Nesi no arguidu hetan Defeza hosi Dr. Calisto Tout hosi Defensória Públiku.

Atu hetan informasaun kompletu favor kontaktu:

Casimiro dos Santos  
Diretór Ezekutivu Interinu JSMP  
Diresaun e-mail: [casimiro@jsmp.tl](mailto:casimiro@jsmp.tl)  
Telefone: (+670) 33238883 | 77257466  
Website: <https://jsmp.tl>  
[info@jsmp.tl](mailto:info@jsmp.tl)

